



大清文宗協天翊運執中垂謨懋德振武聖孝淵恭端仁寬敏
顯皇帝實錄卷之一百九十一

咸豐六年丙辰。二月甲辰。諭軍機大臣等。前因皖省捻匪。逼
近歸德。當令桂良挑選直隸各營精兵二三千名。派員帶赴
歸德。交英桂調遣。諒已遵旨辦理。惟直隸毗連豫境。交界要
隘。均須嚴密籌防。著桂良酌度情形。如該省官兵不敷調撥。
不必拘定二三千之數。或千名。或千餘名。但須兵力堪用。挑
齊後。遴員管帶前往。以資攻勦。至真豫交界設防事宜。最關
緊要。該督現在作何布置。並著多設偵探。將豫省情形。隨時
具奏。以慰廑念。將此由五百里諭令知之。○調陝甘兵二千

名。山西兵一千名。赴河南勦賊。○乙巳。

上幸靜明園。詣

龍神廟拈香。○諭內閣。將霽遠等奏。勦辦定番州境匪徒。克復大塘汛城一摺。貴州都勻等處。苗教各匪。竄擾定番州境。大塘汛城陷失。當經將霽遠等。委署鎮遠鎮副將佟攀梅。帶兵進勦。提督孝順。帶兵由雷波巖脚一帶會合。將大小牛場等處賊寨。概行焚毀。佟攀梅由定番之打華哨擺金一路。進勦至大塘城外。連戰斃賊數百名。進攻大塘汛城。守備王敦倫等。拋擲火器。我軍乘賊驚亂。一擁登城。當將城池克復。餘賊遁逃。生擒賊首吳鳳祥等多名。現在孝順進勦羅斛等處。

佟攀梅暫駐大塘。安撫被脅難民。著將霽遠等。仍即督飭將餘匪拔除。淨絕根株。所有此次出力員弁兵勇。准其擇尤保奏。候朕施恩。○諭軍機大臣等。王履謙奏。歸德被圍。東省沿河喫緊一摺。擒匪全竄豫省。與山東曹單地界緊連。邱聯恩潰敗之勇。據王履謙所奏。在曹河途次盤獲。有歸德城門關閉之語。單縣董家口。已有難民紛紛逃避。並聞該匪分股在南岸劉口屯聚。有來曹單搶糧之意。現當河水乾涸之時。東省下游南北兩岸。無險可扼。防河兵勇。僅止二千餘名。極形單薄。崇恩前奏。調德州高唐等營官兵六百五十名。派緒綸帶赴金鄉縣羊山。扼守曹濟咽喉。調兗中等營兵三百名。備

防河策應。此時曹單情形較前更為喫緊。雖經王履謙派郝上庠前往曹縣堵勒。亟應添撥精兵。分布要隘。防勒兼施。著崇恩即於山東各營汛中。星速抽調。飭同郝上庠所帶兵勇。探明何處緊要。即向何處截擊。並飭達鏞加意嚴防。至該撫前由省城調濟甯駐守之兵。及咨調兗州鎮豫備兵數。共六百名。本為應援各路起見。現應如何布置。迅速馳奏。以慰廑念。至潰勇難民。人數眾多。或恐捻匪溷跡其中。並著崇恩遴委幹員。於沿途要隘。嚴密稽查。毋稍鬆懈。將此由六百里加緊諭令知之。○以勦辦貴州狎匪出力。賞外委陳德英等藍翎。餘升擢有差。○予貴州陣亡知縣黃鳳守備王定臣。外委

方學林。張連舉。祭葬世職。○丙午。諭內閣。葉名琛。柏貴奏。神靈顯應。請加封號一摺。

關帝神威助順。前已疊晉崇封。升為中祀。茲據該督等奏稱。四年六月。廣東省城各門外逆匪突起。攻撲城垣。仰荷神靈默助。連獲大捷。省城得保無虞。韶州。新會。三水。龍川。各府縣。均被股匪圍撲。嬰城固守。亦賴

關帝顯應。得以保全。朕心實深寅感。允宜加崇封號。藉申虔敬。著禮部謹擬具奏。○又諭。葉名琛。柏貴奏。

神靈顯佑。請頒發扁額。加崇封號一摺。前年廣東匪徒。糾眾攻撲省城北門。默邀

寶鑑卷之二十一
三
觀音大士靈佑。返風驅雨。官軍乘勢大獲全勝。又上年正月間。官軍於四沙水面。勦捕匪船。西南風陡起。軍帆順利。雷聲轟烈。

南海神廟前。白霧橫江。官軍乘機開礮。勢如破竹。將匪船全行燒毀。東路藉以解嚴。此皆仰賴

神靈。默為呵護。朕心實深寅感。允宜特申虔敬。以答神庥。所有

觀音大士。及

南海神廟。朕即親書扁額。交該督撫敬謹懸挂。

風神。

雷神。加崇封號。著禮部謹擬具奏。○又諭。向榮。吉爾。杭阿。奏請遴選帶兵得力人員。赴營差委等語。著兵部傳知僧格林沁。在連鎮等處打仗出力人員內。擇其曉暢營務。堪以帶兵者。酌保四五員。奏明請旨發往。○諭軍機大臣等。怡良。吉爾。杭阿。奏。味。喚。二夷。欲求更改條約章程等語。味。酋。咱。噶。移文。江蘇。有候船即赴上海重議條約之說。喚。酋。李。奉。國。亦有各國條約。必求更改。廣東絕之已甚。各國公使。萬不肯再向關說之語。是其意以欲赴上海為挾制。而藉口於廣東之拒絕。情形顯然。從前五口通商條約。雖有十二年再行更定之議。不過恐日久弊生。或有窒礙之處。不妨小有變通。其大段章

程。原未能更改。該夷前年在上海天津。要求各事。均屬萬不能行。經崇綸等。面加駁斥。該夷酋亦自知理屈。不復爭論。今云廣東絕之過甚。故赴上海。蘇省督撫。本非總辦夷務。自不能允其所求。必至上赴天津。更屬不成事體。著葉名琛。體察情形。妥為駕馭。如該夷所欲更改之事。實止細故。不妨酌量奏聞。稍事變通。如仍似前年之妄事要求。即行正言拒絕。務宜恩威並用。絕其北駛之念。勿峻拒不見。轉致該夷有所藉口。並著怡良。吉爾杭阿。飭令藍蔚雲。轉諭各該夷領事。告以五口通商事宜。悉歸廣東查辦。他省均不得越俎。該夷若不肯向廣東關說。別省無可代為商辦。此次照會各情。業已入

奏。亦止能請交廣東欽差大臣查辦。至於更議之處。該督撫不能與聞。婉言開導。令其駛往廣東。不至別生枝節。是為至要。怡良等原片。著鈔給葉名琛閱看。將此由五百里各密諭知之。○又諭。向榮。吉爾杭阿。奏瓜鎮逆賊。衝竄高資。勦擊獲勝一摺。前因金陵逆賊。圖援鎮江。竄至倉頭鎮等處。諭令向榮等。迅速攻勦。毋任洲地各匪。日久占踞。茲閱該大臣等所奏。鎮江賊匪。於金山西面夾江中築壩。直通便民河北岸洲地。遂由金山渡鮎魚套。至黃泥洲。偷劄賊壘。竄撲高資。吉爾杭阿等。派兵接仗。雖有斬獲。而黃泥洲之賊。尚未驅除。傷亡弁兵。亦復不少。未操勝算。該洲去倉頭鎮三十餘里。若使上

下流賊匪聯絡。則該逆內犯之志愈堅。沿江一帶地方遼闊。節節設防。徒費兵力。惟有扼要衝擊。使賊兵不能連為一氣。以挫賊鋒。而圖制勝。著向榮。吉爾杭阿。簡派精銳。將上下游洲地各賊壘。次第勦除。並遏旬容等處內竄之路。仍嚴絕鎮江接濟。勿稍鬆勁。至兵力既無可添調。而招募遣勇。總須來歷清楚者。方可收錄。勿令奸徒溷跡。致有貽誤。將此由六百里諭令知之。○又諭。駱秉章奏。克復松桃。銅仁兩城。請飭辦善後。以弭釁端一摺。黔省苗匪肆擾。攻陷松桃。銅仁。經駱秉章督派員弁兵勇。不分畛域。由楚入黔。先後將兩城克復。辦理尚為迅速。惟首逆徐廷杰。是否就戮。尚未可知。而在逃餘

匪。亦必須搜捕淨盡。方能永杜亂萌。蔣蔚遠身任該省封圻。責無旁貸。銅仁之變。既以錢糧肇釁。總由官吏辦理不善。以致頑民轉相煽惑。著蔣蔚遠簡擇廉能文武員弁。酌帶兵勇。前赴銅仁。松桃。妥為經理。一面安撫良民。一面將在逃餘匪。嚴密搜捕。毋任漏網。總期勦撫兼施。肅清邊境。至各該地方員弁。如有貪虐激變。及臨事逃避者。即著據實叅辦。以儆其餘。將此由六百里諭令知之。○以克復廣東新興縣城。賞遊擊張遇清。巴圖魯名號。守備葉啟文。花翎。武舉歐定邦等。藍翎。餘升敘有差。○以勦辦廣東陽春縣游匪出力。賞千總呂文光等。藍翎。餘升敘有差。○以克復貴州銅仁。松桃府廳城。

湖南總兵官文安道員崔誥下部優敘○予江南陣亡守備
劉襄顧維正千總蔣國材祭葬世職○予廣東陣亡巡檢胡
長祭葬世職○丁未

上御勤政殿聽政○諭內閣前年逆匪渡河北竄特命奉命大
將軍惠親王參贊大臣僧格林沁統帶京營勁旅滿漢官兵
及三盟蒙古官兵剋期進剿業已悉數殄滅殲擒首逆方冀
各路統兵大臣愧奮激發迅速圖功俾逆氛次第掃除吾民
得安衽席乃金陵首逆日久稽誅鎮江瓜州尚未克復安徽
江西湖北賊蹤肆擾雖捷奏頻聞勢已漸蹙而勞師數載兵
力漸疲亟應厚集精兵以期大舉著內扎薩克哲里木卓索

圖昭烏達錫林郭勒烏蘭察布伊克昭各盟於所轄四十九
旗內挑備驍健官兵臆壯馬匹備齊軍裝器械聽候調遣一
俟秋高氣爽即當簡派重臣統帥南下加以京營勁旅滿漢
重兵分道出師殄除羣醜諒茲窮寇不難一鼓蕩平各路統
兵大臣仍當實力攻剿將賊匪占踞各城迅圖克復若俟大
兵南下始奏膚功遲延觀望之罪責有攸歸其各懍之○諭
軍機大臣等安徽捻匪竄擾河南歸德一帶現經英桂督辦
三省會剿事宜兵力尚單昨已諭令直隸山西陝西各督撫
調撥兵丁前往助剿著穆隆阿慶昫於察哈爾官兵內挑選
精銳二千名派委得力將領帶赴張家口駐劄仍飭帶兵官

勤加操練。務期技藝嫻熟。候旨調遣。將此由四百里諭令知之。○又諭。現在各省軍務未竣。擒匪又在皖豫交界肆擾。各省兵勇尚恐不敷調遣。亟應先時籌撥。備禦不虞。著承志於所屬各旗兵內。挑選勁旅二千名。豫備軍裝器械。選派得力將領管帶。即在該處勤加操演。聽候調遣。一俟奉有諭旨。即令剋日啟程。將此由四百里諭令知之。○湖南巡撫駱秉章奏。賊氛未靖。籌辦防剿。秋審人犯。應否仍遵四年諭旨。覈減罪名。先行發配辦理。得旨。仍著照四年諭旨。分別辦理。○以太常寺卿周玉麒為內閣學士。兼禮部侍郎銜。仍留浙江學政任。○以翰林院侍講學士倭仁為光祿寺卿。○以勦捕山

西陽城縣匪徒出力。賞道員瑞昌。參將張會川。花翎。遊擊珠爾杭阿等。藍翎。餘升敘有差。○調綏遠城兵一千名。吉林。黑龍江兵各五百名。赴山東曹州。防堵竄匪。○戊申。諭內閣。福濟奏。請將實心任事之知縣。鼓勵一摺。安徽署天長縣知縣陸豫。徵解獨多。濟餉無誤。署滁州直隸州知州。揀發知縣陳麒昌。辦團禦賊。克保城池。保升直隸州知州。署霍邱縣知縣王啟秀。追捕土匪。安靖閭閻。均係實力辦公。為州縣中出色之員。自應量予升階。以昭激勸。陸豫著免補本班。以知州即補。陳麒昌著免補本班。以同知直隸州即補。王啟秀著免補本班。以直隸州知州即補。○諭軍機大臣等。和春。福濟奏。皖

省捻匪未清。官兵未能過境等語。捻匪巢穴雖在皖境。而大股數萬。直逼歸德。豫省兵勇。為數無多。待援孔亟。前因道路梗塞。故諭令將鄭魁士等宿州一軍。暫歸和春。福濟調度。昨以歸德危急。復諭和春等將鄭魁士。塔思哈。所帶官兵。並伊興額。德昌等馬隊。飭令星馳赴豫。原以皖省兵勇尚多。緩急輕重之間。自應統籌大局。今據奏稱。江。皖。豫。三省。祇能各顧本境。是鄭魁士等。竟不赴豫應援。而以全股巨匪。諉之豫省。儻歸德稍有挫失。匪蹤蔓及汴梁。該提督等。援救遲延。豈能辭罪。著和春。福濟。仍遵前旨。即飭鄭魁士。塔思哈。督帶官兵。與伊興額。德昌。所帶馬隊。迅速馳赴歸德。聽候英桂調遣。儻

皖境必須留兵。則於鄭魁士。塔思哈二人中酌留一員。其伊興額等馬隊。必須全數派往。如再延不赴剿。朕必治和春等以推諉觀望之罪。懍之。至所請飭催四川。陝西。浙江。解款。已諭知各該督撫催解。其山西省每月解銀五萬之處。亦諭知王慶雲。酌解數月矣。該提督等。仍當催提江海關稅銀。以資接濟。不得恃有此款。任令延宕。將此由六百里加緊諭令知之。○又諭。和春。福濟。奏。皖餉匱乏。請飭催各省協濟等語。所奏自係實在情形。著黃宗漢。何桂清。吳振棫。各將該省應解安徽款項。儘數湊解。源源接濟。俾資兵食。無誤要需。將此由五百里各諭令知之。○又諭。和春。福濟。奏。前撥江蘇關稅銀

兩。據吉爾杭阿咨稱。未能限定數目時日。難以應急。請飭山西省。每月撥銀五萬兩等語。皖省待餉急迫。惟山西省撥款較多。若必按月五萬。恐難如數。著王慶雲酌量情形。暫行籌解數月。俟蘇省關稅。有可接濟。即行停止。將此由五百里諭令知之。○以勦辦廣東三水縣賊匪出力。賞遊擊黃曜吉。巴圖魯名號。守備何雲章等。花翎。典史王朝選等。藍翎。餘升敘有差。○以安徽亳州守禦出力。予副將朱連泰。以總兵升用。賞知州博銘。守備馬振瀛等。花翎。衛千總汪位育等。藍翎。餘升敘有差。予陣亡把總李大鵬。祭葬世職。○以安徽盤獲逆匪。賞未入流劉清奉等。藍翎。並升擢有差。○己酉。頒廣東廣

州府。

觀音大士廟。

御書扁額。曰普佑大千。

南海神廟。

御書扁額。曰鏡海流慈。○諭內閣。前任江蘇學政奎章奏。關防未能交卸。請旨遵行一摺。新任江蘇學政李聯琇。現在福建審辦案件。到任尚需時日。所有學政關防。著交怡良暫行管理。奎章著即回旗。○又諭。英桂奏。總兵勦匪失利。請分別革職摘頂等語。河南南陽鎮總兵邱聯恩。河北鎮總兵崇安。經該撫派令督帶兵勇。迎勦捻匪。乃邱聯恩於前隊獲勝之時。

未能整齊列陣。輕率進兵。被賊抄襲。崇安督率後隊。亦未能相機策應。俱屬咎有應得。邱聯恩。崇安。均著革職。暫行留任。崇安並著摘去翎頂。以觀後效。儻不知愧奮。即著嚴參治罪。○諭軍機大臣等。英桂奏。擒匪情形。請三省各防本境。另簡大員。專駐亳州。進剿一摺。從前勦辦擒匪。未能得手。既因在事諸臣。不克和衷。此時專派英桂督勦。事權歸一。應如何統籌大局。分別緩急。催兵進剿。乃請簡派大員。進駐亳州。分投勦擊。直似江皖兵勇。皆非所轄。希圖卸責。試思封疆大吏。經朕畀以督勦重任。豈尚不得謂之大員耶。前因擒匪直徧歸德。諭令和春。福濟。即調鄭魁士。塔思哈。所帶官兵。並伊興額

等馬隊。赴豫應援。今歸德已無匪蹤。情形一變。應令鄭魁士等。先由何處進剿。著英桂即行飛調。現在河南兵力甚單。昨已諭令直隸省調兵一千二百名。山西調兵一千名。陝西二千名。馳往歸德。交英桂調遣。此項官軍。陸續可到。著即分撥進剿。不可令其株守歸德。本日據王履謙奏。南岸劉口。北岸曹河。民房官舍。均被該匪焚燒。是匪蹤已曾擾及北岸。現雖暫時回竄。難保不去而復來。設此路稍有疏虞。又蹈上年粵匪故轍。本日已諭崇恩帶兵出省。赴曹單一帶督防。其傅振邦等官軍。本在英桂調度之內。即飭令嚴堵蕭碭。迎頭截擊。不可任其深入徐州。英桂居中調度。總當遏賊北竄。令帶兵

各員由北而南一路截勦方操勝算若以重兵悉置南路不啻驅賊北來輕重失宜必致蔓延腹地此乃大局形勢不可不知者也連鎮帶兵得力人員已飭部揀發赴豫前據僧格林沁奏稱西凌阿善帶馬隊史榮椿善帶步隊人皆誠實然須用當其才使不至有所掣肘方能得力該二員現在該撫營中著察看委任永城之圍是否已解虞城夏邑等處有無賊蹤此次摺內均未敘及瑛榮等因該匪北竄劉家口等處省城亟應守禦奏請派兵防勦今劉口之匪雖已南竄省城重地仍應嚴為設防著傳諭該藩司等妥為布置毋稍大意將此由六百里加緊諭令知之○又諭皖省捻匪分股竄擾

勢極剽悍山東曹單等縣與河南虞城江蘇徐州等處在在接壤該匪等竄至劉口分踞上下河灘董口南岸亦時有騎馬匪徒往來自係意圖北竄且恐其窺伺豐沛圖犯充濟山東省南界情形實為喫重前據崇恩奏稱派委郝上庠等抽調兵勇於豫東交界相機堵禦惟兵力較單且曹單災民甚多亦恐郝上庠難於兼顧著崇恩調撥該省精兵親帶出省前赴曹單一帶督同該護鎮等將應守要隘派撥兵勇嚴密布置一面撫恤災民毋令勾結為患前調德州等處官兵自已到防崇恩到後兵力較厚儻捻匪北竄即可相機進勦北路防堵尤關緊要設有疏虞朕惟崇恩是問該撫接奉此旨

著將啟程日期。先行馳報。毋許遲延貽誤。再據王履謙奏稱。擒匪在劉口屯聚時。忽有荷澤人馬振清弟兄。率領千餘人。在單縣東關滋擾。假稱奉英桂諭令募勇三千。前往歸德。旋即四散等語。匪徒滋擾。每恃內應。馬振清等。是否係該處土匪。圖與擒匪勾結。著崇恩密速查訪。嚴拏懲辦。以消內患。將此由六百里加緊諭令知之。○戶部奏。遵覈酌增各直省文武官員養廉。福建業照減成原案議增。無庸再議。此外各省。擬即自本年夏季起。文職一二品。酌給七成。三四品。酌給八成。五品以下。及七品正印官。與武職三品以上。酌給九成。其餘文職六七品以下。佐貳雜職。武職四品以下。以及軍營帶

兵效力各員。均照原額支給。得旨。所有各直省官員養廉。自本年夏季起。文職一二品。三四品。五品以下。及七品之正印官。武職三品以上。均著照該部所議酌增成數支給。俾資辦公。以示體恤。○予河南陣亡守備苗太源。祭葬世職。○庚戌。以大學士裕誠。署正白旗領侍衛內大臣。○予廣東陣亡都司陳國輝。祭葬世職。生員陳國勳等。賞卹如例。○予廣西陣亡外委邱廷榮。祭葬世職。○辛亥。諭軍機大臣等。昨有旨。令崇恩調撥精兵。親自督帶出省。赴曹單一帶。相機進剿。本日據該撫奏。董劉等口。已無賊蹤。二縣兵勇。已有三千餘名。嶧滕防兵單弱。現擬添兵扼堵韓莊等語。擒匪分踞上下河灘。

本圖北竄。並在劉呂曹河。焚毀民房官舍。因聞達鋪郝上庠等帶兵趕往。暫時退竄。難保不去而復來。雖單縣民團整齊。亦必有大員督勦。方能鎮定人心。况曹單兵單。續調赴防之。濟甯防兵。僅祇三百名。不足以資堵禦。且據英桂前奏。有分股由劉口竄赴碭山之語。並恐窺伺豐沛。圖犯充濟。崇恩惟有親督官兵出省。赴曹單等處。探明防勦。兼可策應嶧滕。現在充曹等處。雖暫時安謐。而賊情變幻靡常。兵進則賊退。兵止則賊來。必待偵探有警。方議徵調。恐緩不濟急。徒誤事機。著崇恩迅速帶兵前進。與河南徐宿各路兵勇。聯絡聲勢。合力勦擊。儻觀望不前。致令匪蹤北竄。恐該撫難當此重咎也。

將此由五百里諭令知之。○又諭邵燦奏。馳抵清江。督辦防堵。並籌接濟一摺。前據英桂奏。捻匪在歸德。分兩股退去。一股竄至劉家口。復東竄碭山。永城一帶。一股分路回竄潁亳等處。此時歸德已無賊蹤。而蕭碭一帶。均有竄匪。傅振邦等自應由近及遠。節節進勦。固不可自撤藩籬。亦未可以防堵為名。一味株守。著邵燦飭令該署鎮等。先行勦除蕭碭賊匪。毋任盤踞。並與皖豫官軍。聲勢聯絡。互相援應。則此烏合之眾。不難次第廓清。現在徐州一路。既歸邵燦調度。著即悉心體察情形。督飭相機前進。軍情變幻靡常。務在先其所急。所需軍餉。即設法源源接濟。毋令匱乏。將此由五百里諭令知

之。○以山東各府州官紳守禦出力。予在籍侍郎車克慎。前任巡撫傅繩勛。按察使孫毓淮。議敘。賞已革巡撫馮德馨。六品頂帶。知府王觀澄。遊擊王殿元等。花翎。知縣韓雲濤。藍翎。餘升敘有差。○壬子。諭內閣。恆春奏。勦辦劫獄戕官匪徒完竣一摺。雲南彌勒縣道人朱姓。糾合夥黨多人。突入縣城。將該縣知縣璩恩。殺害。並其家屬下役數十人。開放監犯。搶掠銀兩。當經恆春。派委護鹽法道鄧爾恆。署副將陳得功。統帶官兵前往。會同巡東道潘楷。查辦。並經署廣西直隸州彭克儁。汎弁馬中驥等。生擒賊首吳美。朱順等。二十餘名。已革守備施家瑞。緝獲賊首趙璞等。三十餘名。署阿迷州官昕。督

同眼線。拏獲逆首朱憲。即鍾潮順。賊首王贊汶。地方均已肅清。彌勒縣典史江吉鈞。於印官被戕。監犯被劫。毫無防範。實屬無能。著即革職。巡東道潘楷。署廣西直隸州彭克儁。於所屬匪眾滋事。咎有應得。惟帶兵督辦。殲擒首逆。功過尚足相抵。潘楷。彭克儁。均著免其議處。○諭軍機大臣等。邵燦奏。徐州情形喫緊。請添撥兵力扼守一摺。前此英桂奏請。三省各防本境。朕因歸德已無賊蹤。諭令該撫飛調鄭魁士等。探明何處喫緊。即先由何處進勦。茲據邵燦奏稱。擒匪由歸德分股。東擾小楊集。碭山西路。賊已逼城。其由夏邑太平集竄入者。距城亦僅三十餘里。且夏白。任乾。兩股。並在宿州之疇町

孫町一帶。聲言欲往徐州報復。該處為北路屏蔽。捍衛宜嚴。傅振邦。興慶。駐劄蘇家集等處堵禦。兵力極單。勢難兼顧。碭山。著英桂傳諭鄭魁士等。分兵前赴碭山應援。毋許遷延。並飭傅振邦等。以勦為堵。不得藉詞保守徐州。任令捻匪蔓延。將此由六百里加緊諭令知之。○命署江甯將軍福興。幫辦江南軍務。○命貴州布政使炳綱。來京。以雲南鹽法道王成璐。署貴州布政使。○以勦辦雲南彌勒縣土匪出力。賞守備門國安。花翎。同知官昕等。藍翎。餘升敘有差。予禦賊被戕知縣璩恩。綬。外委馬中驥。祭葬世職。○予江南陣亡知縣松壽祭葬世職。○癸丑。遣官祭

歷代帝王廟。○諭軍機大臣等。官文奏。師久無功。自請從重治罪等語。前因德安。武漢等處。先後被賊蹂躪。楊霽。西凌阿。勦辦無功。特授官文以督師重任。該大臣總統師干。自當隨機應變。出奇制勝。乃遽以調度無方。自請治罪。當此事機喫緊之時。豈容置身事外。朕於各路統兵大臣。有功者不吝爵賞。有罪者亦自有權衡。該大臣惟當激勵士氣。設法圍攻。以副委任。豈得以請罪虛文為塞責耶。現在興國大治一帶。賊援踵至。據稱楊載福水軍。僅能遏賊上游。荆襄水路紛歧。宜防竄突。即當杜絕外援。力圖克復漢陽。兼顧荆襄門戶。並與胡林翼等。謀勇兼施。聲勢聯絡。以期一鼓蕩平。毋得觀望畏

難。致挫三軍銳氣。將此由五百里諭令知之。○甲寅。孝昭仁皇后忌辰。遣官祭。

景陵。○諭內閣。載齡奏。差派並告假赴京各員。請嚴定逗遛處分等語。

各陵差派。並告假赴京各員。自應如期銷差。茲據該總兵查明在京逗遛各員。竟有二十餘人之多。實屬不成事體。著各該衙門。查照單開各員名。迅速催令銷差回任。以重職守。嗣後因差及告假各員。如有在京逗遛者。著該部明定逾限處分。即由守護。

陵寢大臣。會同該總兵。查明參奏。○又諭。載齡奏。請將管理

陵寢樹株官員。定擬勸懲章程等語。

陵寢樹株。向由內務府官員督率樹戶。澆灌培養。歷年回乾數目。多寡不同。難保無捏報之弊。著照所請。嗣後回乾樹株多寡。應如何酌定章程。將該員等分別議處獎敘之處。著該部妥議具奏。○諭軍機大臣等。穆隆阿等奏。遵旨挑選官兵一摺。察哈爾應挑官兵。據奏。將曾經出師年壯技優者。挑拔三千名。於什巴爾泰博羅柴濟地方齊集。再由穆隆阿親赴該處。揀選二千名。跟役兵三百名備調。著照所擬辦理。此項官兵。為豫備勦匪之用。務須一律精銳。毋得以老弱充數。總管約遜等四員。既係出師得力之員。著即交該總管侍衛等。分

別管帶。勤加操練。將來調遣時。即著統帶前往。所需馬匹。准其於各扎薩克蒙古等捐輸馬匹內。挑選臆壯馬二千三百匹應用。其餘軍裝器械等件。並著先期豫備齊全。以免臨時貽誤。將此諭令知之。○乙卯。諭內閣。英桂奏。團勇擊散捻匪。永城解圍一摺。捻匪前徧歸德府城。因見守禦尚嚴。遂分股回竄皖境。其圍永城之匪。日久未解。先經英桂調撥兵勇援剿。鄉團聞官兵將至。糾集五六千人。裹糧助剿。署永城縣知縣劉鴻昌。守備張邦瑞。同官紳人等。從城內殺出。與團勇內外夾攻。生擒匪首劉五等五名。奪獲器械無算。城圍立解。著英桂嚴飭在事將弁。將本境餘匪悉力搜捕。並一面飛咨鄭

魁士。迅剿潁亳一帶。直搗賊巢。毋使滋蔓。○諭軍機大臣等。英桂奏。永城解圍。並現在布置情形一摺。捻匪大股。回竄皖境。歸德情形較緩。永城又已解圍。徐宿兩軍。自可毋庸赴豫。所有皖境捻匪。著責成鄭魁士等。實力剿除。其永蕭交界之李大喜一股。業已敗回。若碭山亦無賊蹤。則傅振邦。興慶等。即應由江皖毗連處所。進兵會剿。不可徒防本境。稍存畛域之見。總以嚴扼北犯。不使蹂躪完善之區為要。現在賊情戀其巢穴。正可驅令歸巢。然後聚而殲旃。庶不致匪蹤四出。防剿難施。英桂此次奏報。布置情形。均尚妥協。徐宗幹。於山東情形。素為熟悉。該撫既令駐劄劉家口。即可激勵鄉團。以資

實錄卷之三
扼守。昨已有旨。嚴催崇恩帶兵赴曹單一帶。嚴密布置。著英桂傳諭徐宗幹。與崇恩聯絡聲勢。並將曹單一帶情形。飛報英桂。隨時具奏。歸德附近小股匪徒。即責成邱聯恩。迅速剿辦。一俟內患肅清。即可進兵皖境。勦賊歸巢。其西通開封之路。即責成崇安嚴扼。毋許鬆懈。現調之直隸兵一千二百名。山西兵一千名。均已啟程。不日即可到豫。其陝甘兵二千名。諒亦陸續進發。英桂務當飭令由北路一帶。節節進剿。不可株守歸德。至傅振邦以防守本境為詞。鄭魁士又稱進剿懷遠。是否遷延觀望。抑遵邵燦。和春等調度。幸此時歸德可緩救援。若仍前危急。豈不貽誤大局。著邵燦。和春。福濟。查明具

奏。英桂既督勦三省捻匪。此後道路不致梗阻。所有蘇皖各鎮將。仍應聽英桂調度。以期事權歸一。毋致歧誤。將此由六百里加緊諭知邵燦。和春。福濟。英桂。並傳諭徐宗幹知之。○以河南永城縣解圍。賞知縣劉鴻昌。守備張邦瑞。花翎。並升擢有差。○丙辰。遣官祭賢良祠。○諭內閣。承志等奏。查看金州地震情形一摺。奉天金州地方。於上年十一月。十二月間。連次地震。以致城垣塔口。有坍塌段落。並震倒旗民住房多間。雖據奏稱。均係散處各村屯。一二間至十數間不等。並未大有損傷。朕心實深矜憫。所有鑲黃等四旗界內。震倒旗民各戶住房。五百六十餘間。加恩著照例給與修費。仍著該署

將軍等。飭令該旗民地方官。妥為安置。毋令遷徙失所。惟該州地震。既稱於去歲十一月初三日起。至十二月十二日止。何以遲遲至今。始行入奏。殊屬不知緩急。此後有無復震。並毗連處所。有無震壓情形之處。著即隨時奏聞。以慰塵念。○諭軍機大臣等。滿慶奏。遵查廓番情形。請暫緩統師前進一摺。前因廓番投遞夷稟。情似悔罪。曾諭令赫特賀。滿慶查探確情。妥為駕馭。茲據滿慶奏稱。廓番因天朝命將出師。中懷恐懼。有罷兵求和之意。所謂前藏土兵。已經赫特賀。飭令截留。未便愈張聲勢。轉致該夷疑慮。且前藏值達賴喇嘛圓寂。事務較繁。亦未能遽置前往等語。自係實在情形。滿慶著准

其暫緩馳赴後藏。惟夷情反覆無常。仍著赫特賀。確加偵探。如該夷果知畏懼。願將占踞各地方。悉行退出。並遵前次剖斷。自應相機辦理。以息兵端。僅該夷前遞稟函。不過為緩兵之計。春融以後。復肆猖獗。則仍應懾以聲威。使知震慄。以期就我範圍。一切操縱機宜。並著赫特賀。與滿慶函商斟酌。熟籌妥辦。毋得稍涉疏率。滿慶另摺奏。藏臺防兵。請就地招募等語。藏臺防兵。募補章程。著准照所擬各條。暫行變通辦理。俟軍務告竣後。或作為定例。或仍照舊章之處。由駐藏大臣。具奏請旨。將此各諭令知之。○又諭。向榮奏。截勦內竄賊匪。疊獲勝仗。並沿江竄匪聯絡。堵勦喫緊一摺。該逆自占踞倉

頭嚴巷後。雖經官軍連日痛勦。而賊黨愈眾。復由沿江炭渚橋頭一帶。步步築壘。綿亘洲地至百餘里之遠。斷非隨處設防。所能堵截。覽所奏接仗情形。將士皆能用命。而洲地港汊紛歧。必須水陸夾擊。向榮所調怡良兵二千名。即著飛提赴營。派撥助勦。本日復諭知何桂清。於浙省防兵內。酌量籌撥一千。或數百名。即可飭交鄧紹良等。分投堵擊。總以力掃賊壘。使沿江之賊。不能與瓜鎮句連。庶可杜其內犯。至黃泥洲賊匪。既自瓜州繞越竄出。瓜州賊營。必已空虛。托明阿等。即不能杜其由江邊竄越之路。豈不能乘賊空虛。力圖克復。似此因循坐視。殊屬不知大局。著懍遵前旨。迅將瓜州賊巢。剋

日掃除。以分南岸之勢。無得徒事遷延。自干咎戾。將此由六百里加緊。各諭令知之。○又諭。逆匪自竄踞倉頭。顧家壩等處。屢圖內犯蘇常。漸與下游瓜鎮竄出股匪。繞越通聯。近復探聞上游賊援。又有萬餘踵至。欲由石埠橋東流等處衝竄。而向榮一軍。除調往各路外。存營兵不過四千名。雖經向榮會商怡良。於蘇省籌兵二千。更替扼劄。仍恐兵力不敷。賊勢日增日眾。我兵愈分愈少。覽所奏情形。實屬萬分緊急。蘇常為浙省門戶。設有疏虞。何堪設想。著何桂清。即於該省存兵。及各路防兵內。籌撥勁旅千名。選派得力將弁管帶。迅速馳赴向榮軍營。聽候調遣。如該省之兵。實係無可分撥。亦務須

酌量緩急。通籌大局。調撥數百名前往。以資攻勦。而助聲援。將此由六百里加緊諭令知之。○予江南陣亡千總彭秀剛。把總董洪升。外委吳雲忠。祭葬世職加等。○丁巳。清明節。

上詣

安佑宮行禮。○遣官祭

永陵。

福陵。

昭陵。

昭西陵。

孝陵。

孝東陵。

景陵。

奉陵。

奉東陵。

裕陵。

昌陵。

昌西陵。

慕陵。○遣官祭

孝靜康慈皇后暫安寢殿。○遣官祭

孝德皇后殯宮。○遣官祭

端慧皇太子園寢。○諭內閣。蔣霽遠。孝順奏。勦辦匪徒。克復
府城一摺。貴州銅仁匪首徐廷杰。連陷四府一廳。疊經官兵
撲勦。收復思南。松桃。思州。該匪尚在石阡。及毛家寨等處屯
聚。候補同知王敬烈。署餘慶縣知縣彭瀾。帶兵進勦。署知府
黃培杰。約齊團練。奮力迎擊。追抵石阡城下。官兵踴躍齊登。
當將府城克復。毛家寨匪黨。望風而潰。賊巢盡行焚毀。惟時
湖南兵勇。越境會勦。業已克復銅仁。餘黨潰散。著蔣霽遠等。
嚴飭各員弁。迅速撥勦。務將匪首徐廷杰。毛大先等。悉數擒
獲。以淨根株。署石阡府知府黃培杰。署石阡營都司陳定元。
均著開復革職處分。並免其查辦。遊擊鄂清。於楚兵協勦銅

仁時。帶勇打仗七次。隨同克復。尚屬愧奮。著免其查辦。○予
貴州陣亡舉人劉慶元。賞卹加等。

大清文宗協天翊運執中垂謨懋德振武聖孝淵恭端仁寬敏
顯皇帝實錄卷之一百九十一

